

# Jubileumbrunch 2010

[Jubileum: 50 jaor rapido](#) >> [Jubileumjaar](#)



Normaal gespraoke zuüsse met de **50** Abraham of Sarah.

Maar veur de meiste clubleeje is det al efkes geleeje en die weite intösse auk waar de beste môsterd gehaold wuerd, asse daovan hils tenminste.

Enfin; 3 januari, un romantisch landschap, met nog maagdelikke snieëj waat op zôndaagmorge véur 11.00 oor nog waal wilt lökke.

Allemaol geregeld door de jubileumcômmissie.

Zelfs ut buffet had al un ganse rit gemak.

De kok kwaam oèt Brunssum, hae meus ièrs alles ophaole in Echt beej stichting Pepijn en Paulus.

Toen alles oèstalle in Holt-Blieërick en det door dae snieëj veur un club die toevallig 50 jaor besteit.

De môs maar zoeë gek zien.

Vuul aetmateriaal meus nao den brunch ouk nog truuk gebrach waere.

Ut waar in elk geval prima verzörg.

83 volwassene en 18 kinder die aan 5 lange taofels zoote, ware op ut buffet aafgekômme. D'r waar auk un aparte VIP taofel gemak, dao zoot de meiste tiëd genne h.....VIP aan. Hebbe die waal genôg gegaete ?

Nao de speech van de veurzitter ; “dae meint altiëd dette as ièrste waat môt zegge en luet gewoeën idderein met honger in de zaal zitte”, mochte we intelik tooste en de kinderriekste taofel mog beginne met aete.

Tössedor woort d'r unne tombola gehalde um de jubileumpot te spekke.

**5** rôndes, waovan eine speciaal veur de kinder.

De meiste priëze waare gesponsord en d'r zoot vuul broëkbaar en drinkbaar grei beej.

Maar ut trekke van de nummerkes waar ech doorgestaoke kaart.

## Un veurbeeld:

Mariël S. meus 'n rônde de nummerkes trekke en had met Theo aafgespraoke: as dich wils det ik nummerkes trek môt d'r waal waat taegeneuver staon.

En jaowaal huer, de 1e priës waas unnen aap veur Hans, dao veel niks van te zegge.

Maar die andere 6 priëze ginge waal hiël toevallig auk naor dezelfde taofel..

Zelfs eur kinder hadde 2 moeije balle gewônne, waat un mazzelkônte.

Mariël schaamde zich un bietje, det kôsse zeen, maar aan zien taofel hadde ze toch un leuk begin van ut nieje jaor.

Ut veel óp det de priëze dikwijls beej dezelfde minse terech kwame en vuul andere hadde niks.

Zuusse waal, gewoeën doorgestaoke kaart!

Sômmige vrooge zich aaf: waat môt ik met dae priès en die hebbe hièl verstendig ônderling eure priès geruuld.

Messchien is ut volgend jaor un ruilbeurs un good idee, got wét waat d'r nog allemaol veur nuttigs op de proppe kump.

De opbrings zoel veur ut wiekend kinne zien of.....!!

Ut veel ouk op det de joekskepel neet vuul speulde; allein aan 't begin.

Messchien veule ze zich neet mièr zoeë lekker in die alde pekskes, ut gold is d'r intösse vanaaf.

Wae löp d'r taegeswaordig 20 jaor in utzelfde pak rônd, nemus toch?

Messchien zoel de opbrings van de ruilbeurs veur un niej pekske gebroek kinne waere.

In China make ze veur unne habbekrats un leuk joekskepelle-pak, met Pieter Willemse as bemiddelaer môt det te regele zien.

De jubileumcômmissie krieg un drök jaor, maar ut begin waar alvesses geslaag.

Elly v. Elswijk